

江西詩徵

江西詩徵卷八十八

南城曾煥賓谷編輯

釋子

正宗

正宗俗姓陳崇仁人居梅山呂居仁曾吉甫韓子
蒼寓臨川日宗遊其門有愚邱詩集

觀孫司戶畫壁

若人胸次間能容書四庫餘地著山川得酒欲飛去摩挲
雪色壁吐作無聲句寒屯水際雲瘦立烟中樹雖非桃花
源亦自有佳處未休蝸角兵欲問樵蘇路祇恐山人笑
我來何暮

次韻蘇堅老秋日登擬峴臺

秋容澹薄晚烟孤千里誰開水墨圖欲借扁舟乘興去臥
看月影弄風蒲

招福寺作

自顧不才同社櫟乘流得坎便爲家體中不快思讀易睡
思欲來還煮茶

善權

善權字與中靖安高氏子爲人清臞人目爲瘦權
落魄嗜酒詩入江西派有真隱集

王性之得李伯時所作歸去來圖并自書淵明詞刻
石於琢玉坊爲賦長句

王郎言語妙天下眉宇清揚聚風雅道山延閣歸有時吐
霧珠綃已無價乃翁勲業誰與儔惠愛宛同陳太邱胡牀
夜據興不淺江波漲月明江樓鄴侯牙鉞三萬軸玉川五
千貯枯腹掌上雙珠照戶庭人間爽氣侵眉目愛君義獻
來仍昆草聖真行事逼真是家此癖古不少奇書異畫元
通神龍眠解說無聲句時向烟雲一傾吐戲拈秃筆臨冰
紈寫出淵明賦歸去杯端飛鳥倦知還陌上征夫識前路
因君勒石柴桑里便覺九原人可起廬山未是長寂寥挽
著高風自君始

仁老湖上墨梅

曾稽有佳客邁軸媚考槃軒裳不能榮老褐圍歲寒婆娑

弄泉月松風寄絲彈若人天機深萬象回筆端湖山入道
眼島樹縈微瀾幻出隴首春疎枝綴氷紈初疑暗香度似
有危露溥縱觀烟雨姿已覺齒頰酸乃知淡墨妙不受膠
粉殘爲君秉孤芳長年配崇蘭

送墨梅與王性之

道人筆下有春色寫出江南雪壓枝千里持來煩驛使暗
香不減隴頭時

眼底春光回隴首雪中疎影落平湖政須送與王摩詰對
看輞川烟雨圖

山中秋夜懷王性之

風雨一葉秋北窗夜初永候蟲鳴空階蝙蝠挂藻井龕燈

照凝坐苔壁印孤影試觀鼻端白籠了虛幻境萬事皆浮
休百年政俄頃學詩寒山子造語少機警故人王文度襟
韻獨秀整閒蒙吐佳句惠好灼衰冷何當翳華芝飛步越
林嶺攜手剡荆薪歡言饌湯餅長嘯凌紫烟同升妙峰頂

洪井

水發香城源渡澗隨曲折犇流兩岸腹洶涌雙石闕怒翻
銀漢浪冷下太古雪跳波落丹青勢盡聲自歇散漫歸平
川與世濯煩熱飛梁瞰虛碧洞視竦毛髮連峰翳層陰老
木森羽節洪厓古仙子鍊秀擣殘月丹成已蟬蛻藥臼見
遺烈我亦辭道山浮杯愛清絕攀松一舒嘯靈風披林樾
尙想騎雪精重來飲芳潔

祖可

祖可字正平丹陽人蘇伯固子養直弟住廬山被
惡疾人號癩可與瘦權並稱詩入江西派李商老
尤重之有東溪集瀑泉集

天台山中偶題

僂步入蘿徑綿延趑趄深僧居不知處髣髴清磬音石梁
邀屢度始見青松林谷口未斜日數峰生夕陰淒風薄喬
木萬竅作龍吟摩挲綠苔石書此慰幽尋

李伯時作淵明歸去來圖王性之刻于琢玉坊牆病
僧祖可見而賦詩

坐上柴桑墟落烟眼中百里舊山川侯門稚子似無恙三

徑巾車人絕憐尚友當須今逸少丹青寧復老龍眠流傳
匪獨遺怡玩端使懦夫懷凜然

書秦處度所作松石

憐君作詩自無敵遊戲詩餘畫成癖高堂奮袖風雨來霜
幹雲根動秋色長懷祝融天柱峰萬年不死之喬松觀君
此畫已無數不復望雲支瘦筇

觀壯輿所藏伯時馬

平生徒說追風足厭見駑駘飽芻粟劉侯爲出二馬圖緬
想奇權在圉牧本朝不伐大宛城公初得之無乃驚胡沙
燕山在吾目短草落日低邊明雄姿忽作風動壁意氣騰
驤欲無敵前者驕矜後者馳信矣能先鳥飛疾圉人亦復

江表詩律 卷八 神超然亮作俗肉勤加鞭吁嗟駿骨世多有伯樂不逢長棄捐

絕句

坐見茅齋一葉秋
小山叢桂鳥聲幽
不知疊嶂夜來雨
清曉石楠花亂流

廬山十八賢

不能晉室扶傾覆
盡作西方社裏人
豈意一時希有事
翻令元亮兩眉顰

秋屏閣

袖手章江淨渺然
倚風殘葉舞翩翩
霜鷗睡渚白勝雪
霧雨含沙輕若烟
楊柳一番南陌上
梅花三弄遠雲邊
雁鳴

雙劍忽生興我欲因從東去船

墨梅

不向江南冰雪底乃於毫末發春妍一枝無語淡相對疑
在竹橋煙雨邊

如璧

如璧號倚松老人臨川人俗姓饒名節字德操爲
曾布客與布論不合因祝髮居襄漢閒聲望甚重
呂居仁甚傾倒之詩入江西派有倚松老人集

送故人

秋風夜作萬馬聲草木自有離別情君行何不卜春夏況
我抱病方始嬾吾生不祥憂患并行李四方影隨形少年

之氣追琢盡胸中獨抱渭與涇世人紛紛水火爭我欲從
之憊不能騎馬時尋故人舍掀髯抵掌意自傾圖書萬卷
相將迎座無凡兒眼更明惟酒無量與興會吾醉未去君
經營不用賜金爲解醒一月何必一日醒此中萬事氣自
寧勿語世人人不聽君今胡爲忽戒行使吾此計墮杳冥
君行瀟湘絕洞庭沙頭水落鵲夜鳴想君抱恨寐輒驚起
弔湘纍涕淚橫顧我徒爲世網撓前行霜雪後榛荆誰爲
傳之鳳凰翎與君方駕尋此盟

送善權歸豫章

北斗以南好風土西山爽氣吞吳楚前輩風流固超絕後
生法像仍奇古道人不學祖師禪敗裙破衲今幾年胸中

秀氣磨未盡時出新詩皆可傳都城鼎鼎冠劍偉并埽權
門日中市道人香火辦寂寞有脚不踏公侯地古來賢俊
能幾何只今零落亦已多一見道人氣象足蒲團裴凡生
春和吾思伸眉向林莽未暇優游取卿相扁舟今日與君
別明朝夢落江湖上

贈陳侯

古人已朽不可作長安年少多嶽嶽大官五斗僅代耕舒
緩養高簡然諾陳侯氣穩天機精心胸開霽脫檢繩只今
冠佩奉朝請折節重士身自輕主人斗酒相逢迎金尊玉
槃紅燭明黃花開徹秋未了殘月挂簷霜氣清氣吞百吏
不足數滑稽巧中一座傾座客未用喜且愕陳侯吏事復

不惡簿書獄訟談笑了盜賊骨驚吏膽落至今魯山駕車
處會使齊兒畏朱博方今天子坐明堂指麾羣醜如驅羊
安得吏師如侯者上應列宿布四方政治豈但幾成康

送彭淵才如北都

吾學如水馬盡日忙不進結交有神奇所得盡豪俊十年
困三舍萬事到兩鬢風流半零落吾道或拘窘彭侯南方
來超妙有遠韻落落澗壑姿倒屣解吾慍胸中幾年讀正
朔謹堯舜盤盂百家伎鉤致得幽蘊夜半一商略氣與山
嶽峻方洋及衛霍似是老行陣崢嶸濟時術百未一見信
自言窮達機默與寒暑運功名蓋偶然未暇以身殉偉哉
君子勇一語破幽憤何時燈火底懷抱爲吾盡

次韻劉無言遊法寺

磨蟻迭左右鐵炭互俯仰歲月如牧馬快驟脫羈鞅方希
草元雄未羨畫眉傲劉侯啓予者險韻寫勝賞讀之令人
醒居然見圖像我昔曾此遊僧梵薦盼蠻撞鐘鳴木鯉破
我顛倒想百年能幾何萬事苦鞅掌喪身聲利場齒角伐
犀象前輩曉星散後生春水長君看門外轍盛氣日來往
道人初不省禪寂異到壤乃知雨花地可以透迷網君侯
此嘉集塵跡已相盪投琴寫我歎中夜發哀響

士大夫湛於不義雖窮極富貴君子過之弗顧而况
女子失身委巷容笑之賤亦豈能自拔哉吾友人賦
歎息行有爲而作諸人旣屬和僕亦擬古樂府爲辭

傷之於其末開之以正是亦詩人之意也

歎息復歎息丹砂爲土玉爲石誰家女兒妙無敵日日當
宿淚霑烏問之何思復何憶深顰欲語語不得回身抱琴
不回面清商自寫昭君怨朔風蕭蕭霜月懸萬里黃沙鳴
一鴈此身此意太分明猶恐君侯未會情從頭卻欲爲君
說恐君斷腸君勿聽黃鶴一去已千里雉子高飛亦能幾
人生長短要自裁嗟爾此身今已矣刺刺促促徒爲爾

戲汪信民教授

汪侯思家每不寐顛倒裳衣中夜起豈惟辟食窘僮奴頗
復打門攪鄰里涼風蕭蕭月在庭老夫醉著呼不醒山童
奔走奉嘉客銅餅汲井天未明

爲卿曇輔作一枝菴詩

百年七萬二千飯

見胞胎經

檢校勞生豈無限巍巍孰是真丈

夫應作已作所當辨不信窮通手翻覆自窮自通均不足
窮思大厦千萬閒通或胡椒八百斛道人不與世俗俱一
枝自古巢有餘有時放杖據槁梧睥睨三界如遮廬春風
數日到梅夢吟遶寒香雪欲作歸來趺坐尼師壇柏子煙
消泉一勺圓明妙相本無我一切有求無不可平生高見
隘古人焚棄經方見何左老僧年來學禹步跼蹐鑒井不
能去還丹一粒能幾何從此遊山不知處

潤屋軒詩

層崖如立壁秀潤初欲溜下有癰道人異時妙基構爲山

不爲屋豈待吉日戊軒成玉滿堦不減朱門富松篁旣崔
錯雲霧亦臻輳霜威入松骨古滑噴泉竇谷風卷簷回浩
蕩金石奏騷騷烏夜啼鼎鼎雉朝雊時於藤蘿中便捷一
猿透客來坐胡牀紙帳卷輕皺兒童敬杖履文史當俎豆
微薰出小鼎長瓶上虛甕此樂君有餘何爲尙奔走記我
識君初昂昂野鶴瘦風姿入清古氣象胞九陋我遊山海
閒未獲一角獸如君亦幾何不落餘子後君如佳少年氣
出萬夫右平生千鈞弩要以一手馭雖未鬚眉蒼典型已
可候汲深非短綆善舞屬長袖願君浚其源故道或可復
功成歸此軒趺坐了昏晝

山居

小徑深通竹疎籬巧過藤冷猿嘯古木飢鷲啄寒氷貴客
終難屈蓬門不用謦此中有住處黃卷短檠燈
門擁深深草溪明衮衮沙冷煙浮菜甲小雨薦茅牙老興
元無繫春工竟自華鄰翁卻相可步履過渠家

息慮軒

雨暗藤經屋春深草到門客來非問字鶴老不乘軒花氣
翻詩思松聲撼醉魂呼兒換香鼎趺坐竟黃昏

春日卽事

風光竟歲宜人少樂事惟春取數多果下小驕君借我一
鞭隨意掠煙莎

霸王城

百年父老不知兵
楚漢相持尙有營
日暮牛羊歸虎落
野雞飛過霸王城

答惠海首座海乃圓照禪師小師

流輩推高不獨今
當年成筍便平林
白雲縱有爲霖意
流水曾無戀影心
問道故人歸雨後
供香童子立更深
青山不免露頭角
短幅斜封更嗣音

寄諸同參

好笑多知一老翁
須言妙用及神通
吾無佛語并魔說
誰問南宗與北宗
麤飯有時聊飽腹
破衣隨分且遮風
他年同道如相過
沙鉢煨茶竹葉中

德雲菴

巖下虛通上入雲衆山圍繞一山尊德雲只在此山頂童
子何妨問法門已種穉松三百本待移蒼竹一千根不須
更學藥山老月下嘯聲驚遠村

比復僧相不愚戲作三頌恐傍觀以謂吾徒實有喜
慍故復次來韻不免道破兼寄祖禹同參道人

聖主生知本解禪故教勘破普周天一源大似東西水同
體何殊左右肩把定絲毫渾沮喪放開頃刻便芳鮮衲僧
敗闕知多少且笑髯舒三十年

復用韻自詠倚松

菴外無人誰過前老松千丈獨參天煮茶春水漸過膝卻
虎短牆纔及肩已退晚雲歸浩浩未分芽菊競鮮鮮客來

問我何時住笑指松枝數歲年

松枝一歲長一層歷歷可數

山居雜頌

石楠子熟雪微乾曾向人家畫裏看
覲面似君君未領問君何處有遮欄

禪堂茶罷卷殘經竹杖芒鞋信腳行
山盡路回人跡絕竹雞時作兩三聲

溪邊小立聽溪聲日到溪心衮衮明
獨木自橫人不渡隔溪黃犢轉頭鳴

音嚴臺上平如掌自是遊人路不通
要識音賢真境界亂山如浪湧雲中

眠石

靜中與世不相關草木無情亦自閑
挽石枕頭眠落葉更無魂夢到人間

毛雍玉縣丞到山中

何事凌寒帶曉轍高才不肯簿書昏
別峰小寺已鳴磬夾道短籬猶閉門
雨後松枝渾黛綠凍餘泉竇尙春溫
聊將二物方君德富貴功名不足論

寄呂居仁

向來相約濟時功大似傾伽餉遠空
我已定交木上座君猶求舊管城公
文章不療百年老世事能排雙頰紅
好貨夜窗三十刻胡牀趺坐究幡風

偶成

松下柴門晝不開只有蝴蝶雙飛來蜜蜂兩脾大如蘭應
是山前花又開

李太白畫像歌

先生之氣蓋天下當時流輩退百舍醉中咳唾落珠璣身
後聲名滿夷夏青山木拱三百年今晨乃拜先生畫烏紗
之巾白紵袍岸巾攘臂方出遨神遊八極氣自逸冰壺玉
斗霜氣高鳴呼先生態絕倫仙風道骨語甚真蕭然可望
不可親懸知野鶴非雞羣天寶之初天子逸先生辭去不
肯屈采石江頭明月出鼓枻酣歌志願畢只今遺像粉墨
間尙有英風爽毛骨宣州長史粉黛工誰令寫此人中龍
細看筆意有俯仰妙處果在阿堵中人云此畫世莫比吳

侯得之或不然意侯所愛豈徒爾少惜真才死泥滓先生
朽骨如可起誰爲獵之奉天子作爲文章文聖世千秋萬
古誦聖美再拜先生淚如洗振衣濯足吾往矣

題宗子趙明叔盤車圖後

跌宕平生萬里程盤車一展老心驚溪昏樹老牛爭力似
聽當年風雨聲

贈道士張謙中

道人髭鬚似民部平生篆隸心獨苦世閒筆墨一點無駸
駸氣象追千古道人得師在何許秦漢鼎彝周石鼓若嶧
山碑若詛楚二李而下初不數異時心醉不窺園依繩作
直規作圓一朝妙解古人意脫落尺度誠其天嗟君絕藝

世無敵勿示時流渠未識我亦當年好古人推席爲君三歎息

寄夏思道惠示縑帛

憶昔南方木葉下祝融逗遛不退舍閭閻未簡卒歲材明月滿門自宜夜而今身在天中央日月寒暑遵故常西風今日我爲政冥冥塵沙何可當浮雲倚勢不解事濃陰蔽日釀秋思臥病但知仲卿泣載酒誰問子雲字故人千里知我寒書來遺我帛數端揀絲織作經緯稱長細廣幅尺度寬染人暴練勿設色衣被皎皎識君德

題骨觀畫

白骨纖纖巧畫眉惻惻楚楚被羅衣手持紈扇空相對笑

殺傍觀自不知

答呂居仁寄詩

長憶吟時對短檠詩成重改又雞鳴如今老矣無心力
誦君詩遶竹行

如琳

如琳如璧之僕聞鄰寺長老有道價往請一轉語
忽覺悟遂與如璧同祝髮

韜光菴訪淵公不值

此詩亦見
倚松集

紫蕨伸拳筍破梢楊花飛盡綠陰交道人開戶不知處黃
栗留鳴鵲在巢

惠嚴

惠嚴姓彭氏金谿人出家寶應寺號文惠大師

遊廢圃

亭榭基猶壯笙歌迹已陳竹分通別徑花發屬南鄰雲散
望塵友冰銷炙手人只因忘寵辱到此不傷神

正覺寺

野水痕俱落擎舟日未西斷溝橫略約支徑入招提方廣
原深似竹林境可躋徘徊未能返暝色起前谿

曉瑩

曉瑩紹興中江西僧有羅湖野錄

南昌道中

東游心渺渺趺足步遲遲馬驛黃茅路人家白竹籬歸雲

橫斷嶺落日映荒陂何處可容足長歌招隱詩

自青

自青紹興間居弋陽大山寺跡在特甚本師累責
告之一日謂其師曰弟子欲往京師面聖願假一
乘師惡其狂妄謂曰糞箕扛汝自青立作一詩云
云遂辭去忽一日乘傳而歸奉勅重整山門賜號
曰雲風和尚寺額曰大山寶壽

詩

糞箕扛出轎抬回優鉢曇花向日開但願老師高着眼管
教平地一聲雷

薦福寺僧

僧紹興末住饒州薦福寺寺傍隙地爲人侵漁僧
謂其徒曰地爲他人有而不能直焉用主者爲吾
甚愧之今當去矣卽陞座鳴鼓集衆高吟而逝
絕句

江南江北水雲鄉千頃蘆花未著霜好景不將零碎賣
時分付謝三郎

顯彬

顯彬字守中俗姓周吉安人寶梵寺僧

新月

微光已成魄隱隱夕陽閒六幘無人卷一鉤長自閉輪隨
蟾影長香逐桂枝還三五相將近分明照竹關

淳藏主

淳藏主臨川化度寺僧

山居

屋架數椽臨水石門通一徑挂藤蘿自嫌此處宜投老饒
得溪雲早晚過

隨身只有過頭杖飽腹唯憑折腳鐺幾度遣閑何處好水
聲山色裏邊行

德光

德光號拙菴居南山光華寺深明宗旨淳熙間四
被召對賜號佛照禪師住靈隱時孝宗自眇外國
進千手眼觀音像欲受則納侮正遲疑間廷臣言

可迎至寺中師因舉頌云云舉朝大驚上嘉之歸
老明州阿育山有奏對一篇

千手眼觀音像頌

一手動時千手動一眼觀時千眼觀自是太平無一事何
須弄出許多般

志芝

志芝住廬山歸宗寺

普請罷書偈

茶芽鹿藿初離焙筍角狼忙又吐泥山舍一年春事辦得
閑誰管板頭低

祖欽

祖欽號雪巖住袁州仰山

絕句

千里相尋慰寂寥未嫌風雪路迢迢廬山雖好且休去更撥寒爐話一宵

山居

竟日窗閒坐寂寥岩前稚笋欲齊腰幽禽忽起藤花落欄瀑吹聲度石橋

夾岸桃花紅欲然洞中流水自涓涓山家不會論春夏石爛松枯又一年

桃源圖

春煖洞門花欲然一絲風動釣魚船莫言世上無仙客須

信壺中別有天

道璨

道璨字無文豫章人姓陶淵明之後寶慶時住饒
州薦福寺旋住開元寺後復還薦福能詩有柳塘
外集

和梅邊汪提幹

我夢稽山陰茂林映修竹鑑湖八百里
眼看不盈掬管領天下清此樂梅邊獨
幾欲驅車去雲根夜同宿山空秋月
明安期未可卜蓬萊水清淺褰裳同
往復徑謁蔡少霞不待青童覆共革
新宮銘調高語圓熟

山泉圃中有雪菊盛雪乃開今歲雪止再作猶未開

也山泉有詩次其韻

大雪凍不死秋風吹不開許大天地閒
受得一氣欲生意住根本肯逐陽和回
要從梅兄遊一笑霜雪堆六花已飛舞
槁悴如根荄下有返魂香英英死不摧
老仙造化手妙處能奪胎喚醒萬黃金
桃李皆奴儕對花酌老仙高致誰能陪
東籬有佳人萬夢招不來

野水橫舟

望之一葉輕卽之萬鈞重大風吹不去世
波搖不動送盡千帆飛濟川已無夢月冷
蘋花秋此興白鷗共

潛上人求題菊山

具郎號菊山秀色已衰朽潛郎號菊山
清香滿襟袖天地

一東籬萬古一重九絕愛陶淵明攬之不盈手後人不識
秋多向籬邊守燦燦萬黃金把玩豈長久西風容易老回
首已如帚因潛憶具郎有淚如苦酒

坐圓常汪天軒

缺謀缺

西江示衆語

三洲相接連斷處直如割中洲二十里平沙浮如刷雲開
天四垂雨晴山一抹綠波三萬頃乞與漁翁撥納之窗戶
閒道人巧點綴我來不忍去倚欄腕欲脫草青煙冉冉柳
靜浪聒聒天風駕滄海奔突不可遏欣然見此翁句險眼
能活溯流欲從之水深春岸闊

紀夢

我不識靈溪夢向溪邊去溪遠屋外流橋通溪上路軒窗

面水開水清魚可數煮茶僧請詩茶香竹當戶花纔最淺
紅霜毫脫毛兔引筆信手書波峭含韻度置筆喜語各服
明失沈痼夢覺秋滿房殘月挂庭樹病眩二十年萬花舞
深霧夢中能楷書以我心念故人生孰非夢百年等是寓
便欲驅車去傍溪縛茅住但恐秋雨來溪深不可度

踏雪下雲居山宿崇壽寄草堂

別山三十年見山雙眼碧山靈喜我來一笑作戲劇縱橫
萬花舞變亂山顏色圭璧拔地起自在羣玉國去興紛莫
留下足深沒膝凍合披長絙石礙路敲側躋攀腳未穩失
勢落數尺平生江海屐常患天地窄立處貴穩實取道貴
徑直只要緩步行不在多用力祇以到爲期半途肯休息

須臾到山址坦途隨意適回看行路處倚天立青壁極愛
山上雲長年抱幽石耐得許多清一夜遙相憶

送誠上人

長安城頭秋日黃長安道上秋日涼遊子念親從定起一
衲卷雲歸故鄉七月八月吳楚地十里五里東南疆遙知
子母相見處籬落黃花吹晚香我母今年六十四丈白
髮應蒼浪石田茅屋歸未得西山幾度明斜陽因送君行
發深省天地闊遠愁茫茫他年相尋君勿忘楊柳當門水
蒲塘

賦張寺丞楞寮

楞寮先生千載士草木有誰同臭味外無刀斧剗削痕中

有冰霜不老氣紅紫紛紛滿上林我自無心趁桃李蘇秦
張儀自縱橫寵辱不驚尊連氏梁棟我我入阿閤我自無
心爲杞梓杜喬李固自黨錮網羅不及徐孺子故家喬木
百世陰有此孫枝能蔽芾落去英華植本根深培不朽聖
賢事犧尊青黃互翻覆眼看世事如醒醉願言善保邱壑
姿畱取清風在天地

和余山南僉判清溪觀荷

東風已老南風急浪蕤浮花和露泣翠袖盈盈波上來相
向美人如玉立軒渠一笑俱動容彼此一樣冰霜蹤明珠
散不論斛斗清溪化作驪龍宮大江以東北山北時樣新
妝皆失色古心一寸誰得知江上晚來數峰碧普天之下

率土濱容著不盡胸中春
濂溪愛花我愛葉難將此意輕
語人探尋勝處到深杳
兩眼耽耽天地小不離枝葉見花
實紅白紛紛跡如埽
滕間不著無弦琴酒中清濁時自斟
興寄超然八荒內身在水流香世界
綠雲冉冉撥不開陸地可生能時大
中通外直真絕奇一語能覺千古迷
二百年後誰傳衣清溪滾滾通濂溪

和吳山泉知府

亂來誰訪古杖履竹邊聞
小立真堪畫閑談亦自文
長翁千載語中允百年墳寂寞廬山路
幽尋獨有君

致軒趙使君領客及子姪入山卽事次韻

戴家湖上寺近市有山林雨足四郊潤
雲低盡日陰竹疎

和翠減松老受春深留得行窩住樓頭午漏沈

懷舊業

雲滿空階書滿牀開門對面是清江多時不看梅花影閑卻中庭月一窗

和南屏湯司戶

夜窗燈火共論心喜動鬢眉不自禁嶺海五年雙鬢短乾坤萬事一杯深肝腸疾惡言多直懷抱傷時老易侵歸路江梅花正發書來定寄短長吟

過桃花寺懷東叟

主人去後客來過丹竈重重鎖薜蘿滿院碧桃花寂寞春風不似舊時多

超師房

巖桂花開滿院香
青莎葉底有鳴蜩
人家只在西林住
雞犬聲中又夕陽

上安晚鄭丞相

相國歸來臥舊山
功名雖好不如閑
向來北望中原眼
送在滄波白鳥閒

題水墨草蟲

蜻蛉低傍豆花飛
絡緯無聲抱竹枝
憶得西湖烟雨裏
小園清曉獨行時

寄題高大清東軒

浮花浪蕊易飄零
看著桑麻眼便青
荷鋤歸來春晝永
案

頭重讀相牛經

和吳山泉萬竹亭

風流不減晉諸賢
冰雪精神已凜然
歲晚莫教枝葉盛
聽他明月下青天

和恕齋吳提刑秋陽菴居

截斷人間名利塵
橫塘深碧護新墳
昏明不定霜天月
開合無心竹屋雲
風雨對牀差可喜
乾坤萬事不堪聞
栽松種竹閑功課
卻爲憂時一半分

和謝君澤題弋陽桃花寺並弔鄭盤翁

一曲清溪十二欄
分明常在畫中安
千年藥竈和雲煖
五色丹光奪夜寒
魂些不來懷石友
山居能久是無官
葛翁

顏色紅如染不信桃花樹上看

和雲壑吳衡州

紛紛世事幾昏明作計還山又未成
欲學種松消永日不徒煨芋博虛名
雲開衡岳鵬程闊秋入鄱湖鴈影清
也欲摩挲病來眼春風暖處望前旌

西湖除夜

又來上國看新元細嚼梅花咽冷泉
阿母在家年六十孤兒爲客路三千
身居東海滄波上心在西山落照邊
碧戶朱門楊柳岸不知歸日是何年

案明詩綜此首作後使普
嗣被獲歎懷詩字句小異

此原宋百家詩
存柳塘外集

小南禪師

小南禪師汀州張氏子居廬山羅漢寺

示居士張戒

頭戴烏巾著白襴山房偕汝一年閑出門爲說來時路家在黃陂翠靄間

雲峰德師

雲峰德師住撫州廣壽寺途遇時貴避不及有逢言卽上堂別衆去

別衆

澹然無累水雲僧去住分明葉樣輕十字街頭休作夢五湖依舊一枝藤

清傑

江西詩徵

卷八十八 釋子二

三

清傑號一峰宋時新昌僧

遊雲峰

理策入茶陂山奇水亦奇幽花閑野徑密竹隱疎籬世上
無清隱山中有白眉相逢春滿面談笑自忘疲

卽事

小小漁舟繫柳隄門前春水碧漫溪丹雉鼓翼如驚客飛
上山茶樹上啼

宗振

宗振丹邱人南康雲居寺首座

題壁

住在千峰最上層年將耳順任騰騰免教名字挂人齒

作今朝百拙僧

懷清

懷清號草堂住隆興府泐潭

送崇覺空禪師

十年聚首龍峰寺一悟真空萬境閑此去隨緣且高隱莫將名字落人閒

艷禪師

艷禪師主筠州之三峰嘗喚渡爲溪流所陷童子掖至岸坐沙石閒垂頭如雨中鶴忽指溪吟絕句後無疾而化

咏燕題巨商壁

江正詩集 卷八十八
去年巢寄畫梁邊
春暖雙雙遶檻前
莫訝主人簾不卷
恐銜泥土污花顛

絕句

春天一夜雨
霹靂添得溪流意
氣多剛把山僧推倒卻不知
到海後如何

集道者

集道者泰和真如菴僧禮亘菴爲師有道行一日
辭師遠遊叅學師囑云一箇蒲團一把鋤從容密
密下工夫因緣佛法俱純熟收拾歸來一物無至
廬山崇勝寺悟道每日積柴一片旣滿室辭衆衆
柴曰焚火中出偈云云所遺舍利尙存塔中

火中偈

真如集道者萬緣都放下
四方八面任縱橫
一輪明月當空挂

齊住

齊住吉州青原慧能十四世石門易嗣也從雲蓋
智出家後徧參至石門印契示寂日吟詩示衆云
云

詩

昨夜三更過急灘
灘頭雲路黑漫漫
一條拄杖爲知己
打碎千山與萬山

圓至

以下元

圓至字天隱別號牧潛俗姓姚高安人少習舉子
業二三千言經目輒記去爲浮屠師仰山欽禪師
住建昌能仁寺遠權要避名譽徧歷荆襄吳越之
區有雲溪牧潛集

重登牛頭峰

霜葉黃蝶飛崖泉白蛇挂行行尋故迹往物已屢化高步
萬石上獨立一木下悠然顧吾影殘日在林罅古來遺世
士泯觀混真假所視旣已齊乘險意亦暇智愚相與奪得
失紛代謝吾欲營力耕穿巖樹茅舍

雪

竊鳴風片亂溜凍冰條直夜久忽無聲傍簷時浙瀝青薪

如乃吐紅燈花欲滴閉閣有餘溫蒙衾兀重席

送勤滅宗上人

出家旅殊鄉同里爲骨肉况乃情所厚而茲忽分躅清霜
彫廣野露立凍羣木日莫行子身谿谷映餐宿吾聞含德
者凝視養元矚疾進氣雖銳久踐途乃熟歲晏能復來青
燈共寒屋

贈玉龍曾道士畫龍頭

乖龍逃雨走急落西山陬縮入畫仙筆雷公不能搜畫仙
有墨池尺水滴十洲俗龍作元骨騎入塵寰遊我求寫龍
真畫仙許我不形全恐飛去爲君且畫頭

次韻陪星子湖主簿遊報先寺

木棲與淵蟠所性各有適顧余邱壑戀大藥不醫癖青山
亦可人仁見如素識森然一窗下獻此萬丈碧簿領三秦
決軒昂謝塵迹壯齡已壘組舊閤况列戟操身粉黛側僧
榻羣面壁國鼎筆可扛天機錦自織停驂偶相值顧問借
顏色東風吹芳原衆卉競春日遠郊農餉起煙屋香芋栗
牛鳴雨隴寒釋耒泥濺膝良時一遊豫能不念民疾三宮
山水窟屢鉢恬食息含羞日嶄絕詎意陪履屐終期凌蒼
巔一視空八極

送建昌黃綺秀才踰淮教授

還山羞聽紫芝歌旅館千門講四科絳帳未懸知已少黑
裘漸敝閱人多秋風白下沾巾別落日清淮照影過莫對

飯盤噴苜蓿桑榆雖暖易蹉跎

義塚斜

城闕千棺瘞此斜古堆新穴滿平畝春叢亂哭鵲寡烏雨
樹雜開號笑花散骨已枯昔作肉凝魂猶認土爲家何人
薄莫焚錢去風卷殘灰滿柏槎

次韻答許府判見嘲詩癖之什

君不見蓬萊仙人五雲深興來忽起塵竇心手拈造化作
一劇世上瓦礫皆黃金又不見球宮靈娥睡新起賽喫雲
漿賭骰子驀然發笑成電光不料陰陽噓頰齒道人文章
亦如斯落筆心手不相知豈如曲士拾蠹紙堯桀滿腹堆
羣疑願君閉口毗耶室竺貝孔韋皆長物著鞭掣出靈運

前莫闕生天闕成佛

雪後荆林道中

冷風寒柳閉千門
柳外嘯鴉聚晚羣
殘日暉暉烘雪氣
徘徊半嶺作晴雲

小汊

麻骨燈明竹壁疎
更深入語在茅廬
開篷綠岸去沽酒
點火撥船來賣魚

胡盧

胡盧河畔洗氈裘
日日花香滿水流
嫁得夫郎愛官職
土隨太子取交州

吳王廟

吳王廟近水邊山壁上雕青鬼臂蠻白日鏤中煙色變散
成雲氣滿人閒

送宗岳歸青蓮

布囊詩幾卷歸計亦淒涼不惜經時別應知聚日長石峰
蒸玉氣井水浸蓮香曾許爲鄰寺招余住竹房

逢故人

共看咸淳上苑花錦箋綵句敵春華白頭相見鍾陵市我
亦如君未有家

元夕觀傀儡

錦襠叢裏關腰支記得京城此夕時一曲太平錢舞罷六
街人唱看燈詞

芳塘

芳塘雨霽綠初肥折得青條串露歸一樹殘花喧鬪雀紅
香滿徑撲人飛

寄恩以仁

風柳青青條葉新別愁江畔又逢春交情似我如君少一
度相逢勝故人

送才上人再往湖南

近聞歸又出何事一身忙春路晴猶滑山亭晚更長竹枯
湘淚盡花發楚魂香舊日曾行處因君思不忘

寄志勝上人

自說冬前至深寒信亦稀可知爲事阻應怪與言違羣月

人南去花時雁北飛危闌有斜日獨望更依依

送宗僞

送子江頭水亦悲更能隨我定何時垂楊但爲秋來瘦不
爲秋來有別離

女官墓

隴頭死樹丫微活路口崩亭脚半斜玉骨年深無祭祀變
成蝴蝶撲松花

寒食

月暗花明掩竹房暮寒脈脈透衣裳清明院落無燈火獨
遶迴廊禮夜香

懷本暢上人

畏寒一月閉窗紗愁髮春來半欲華松院晚晴蜂亂出故
應山逕有殘花

見新竹懷兄姚江村

愛酒嫌官姚縣令長年三徑滿荒苔曾因養笋添新竹一
月柴門閉不開

土木渡阻風

空林路盡見波瀾輕槳何時掠水還日暮亂雲如宿鳥隨
風片片泊廬山

初改黃衣

宣詔亭前受牒還御黃新賜滿城看臣僧記得沙彌口齊
著青衣上戒壇

德異

德異上高儒家子弱冠棄俗受皖山凝禪師衣鉢
後住嘉興普光寺作小菴名曰休休至元中兩詔
不起王公貴人多師事之施財百萬爲起佛屋高
麗國主聞其名因僧寫真傳至其國緇素敬仰忽
放光出五色舍利遂請至其國不從歷十餘年坐
化

自贊

淮甸村僧無法可傳丹青描不就五彩亦徒然因禪直下
乘當去十八灘頭浪拍天

希能

希能字存拙臨江人

過彭蠡湖舟中次韻簡見心師

楊柳青青聞櫂歌東風三月放船過山浮空翠濕烟霧江
出大魚吹浪波上疏無因繼嵩璉論詩漫自擬陰何同參
不負凌霄約清夢時時繞薜蘿

雄覺

雄覺臨川人住曹山

題高尙書夜山圖

靜夜江山吳越中高侯筆力壓晴空雲開海市波濤壯月
照城池氣象雄高閣有人瞻北極平林落木趁西風誰知
墨妙留塵世九老風流萬古同

道全

道全字半江俗姓羅上高人延祐間住崇福寺至

正初示寂諡正慧明德禪師

對伽藍神

神具五通人持五戒人傑地靈自然清泰

據室

元亨利貞具大造化晝珠發現照四天下要知此寶元無價

至仁

至仁字行中別號熙怡叟鄱陽人師徑山端和尚住蘇州萬壽寺博綜經傳貢泰甫黃晉卿虞伯生

皆推稱之有澹居藁

奉答虞伯生侍講

散花丈室擁天姝金粟如來安穩無不二門開唯一默對
談還許老文殊

送興祖庭遊會稽

故人別我向何處歲晏扁舟泛若邪萬壑千巖風雪後杖
藜隨處看梅花

送潑上人還日本并簡雙林明極和尚

十年問法天王地萬里鄉山碧海東雪室有禪傳鼻祖蒲
帆無恙轉秋風潮連蓬島晴雲白霞擁扶桑曉日紅爲問
雙林老尊者尺書還寄北來鴻

至正廿二年冬十二月予訪雲海禪師於龍淵山中
握手敘契闊驩甚且觀其殿樓竹樹宛然如全盛時
因念東南幢剎率爲兵燹而朋舊多淪替所歷有滄
桑之歎而禪師之交義之願力有如此者遂作詩以
紀之云

釣艇加沙度曉晴浮圖倒影若門迎碧潭波冷白龍臥翠
竹雲深丹鳳鳴亂後樓臺符願力歲寒松柏見交情欲從
池上結荷屋天地干戈尙戰爭

次韻徐大章移居

借屋藏書避世喧地偏塵遠水雲繁籬前沙渚羣鷗臥村
外人家萬蟻屯春送蘭香浮綺席月移梅影度柴門杖藜

憤識湖東路今雨還尋孺子論

次韻馬國瑞員外遊會稽

勝遊還與馬遷同直上東南第一峰
神禹穴深蒼木合李斯碑在紫苔
封晚雲仙島翔歸鶴夜雨靈湫起
螭龍若見故人煩問訊松間石上幾時逢

李煥章竹石居

翔鳳歷四海故巢何處安蓬萊蒼石外風雨長琅玕

送厚元載遊會稽

江上楊花落孤帆度遠汀潮連滄海白山擁會稽青
逸少龍鵝帖支郎放鶴亭登臨有新製毋惜寄林扃

送愚仲和尚

山陰別後道偏腴海上歸來興不孤短杖看雲懷舊壑扁舟載月度鴛湖豈無大士同香飯會有神龍獻寶珠老桂吹花應有約巖前共聽白猿呼

飲綠軒

道人住清溪日飲溪中綠滌慮發天光心花瑩如玉復愛溪上雲時來簷下宿

送楠上人歸定水并簡見心禪師

阿師說法雙峰下白晝天花作雪飛烽火隔江音問絕秋風海上片帆歸

次韻荅柳仲修宣使

兵戈宇宙誰知已風雨東南話故鄉禪伯自慚非覺老詩

豪今喜得劉郎海門鴈叫江楓赤澤國雲來野日黃悵望
庭闌空白髮菊花霜露幾重陽

贈夏君美同知

海宇煙塵日夜生中興諸將正鏖兵鄭生三寸澗翻舌一
旦來歸七十城

吳門遇江左外史

闔閭城外故人過客裏相逢感慨多夜雨蓮荒廬嶽社秋
風木落洞庭波遠公道業驚吾老潛子才華奈爾何戎馬
十年鄉國夢結茅何處共雲蘿

題秋色歸舟圖

滿目烽煙萬國秋江山何處可追遊吳淞水落鱸魚美風

雨歸來一釣舟

送謙上人還日本并簡天龍石室和尚

回首扶桑若箇邊春風萬里上歸船
神龍饋供雲迷海仙女吹花月在天
密意西來端有得新詩東去豈無傳
若逢石室煩通問歲晚南湖學種蓮

次韻寄唐伯剛斷事

一軒涼雨讀楞伽三復停雲感物華
金粟如來方丈室香風滿地散天花

野水芙蓉繞鶴汀畫橋楊柳挂魚簪
秋風攜手青溪曲竹杖荷衣一箇僧

次韻荅張仲舉承旨

沈香亭北賦名花四海車書正一家總道天關嚴虎豹那
知陸地起龍蛇詞臣自昔推張說邊將何人繼趙奢南國
雲山渾似舊幾時函谷度牛車

次韻簡蘇昌齡學士仲銘禪師

曾向燕然勒漢銘吳門今對萬山青朝端聲價蘇司業海
內交游嵩仲靈何日袈裟登釣艇此時雲錦照溪亭一尊
正候陶徵士莫學三閭愛獨醒

次韻竺元和尚山謳

白雲招我歸清泉濯我足閑將貝葉書遙對青山讀童子
拾松花鄰翁分野藾却憶馬駒師一箭中羣鹿
千峰梅雨歇繞舍流泉音萬物各有適孤雲獨無心時歇

少林曲還共寒山吟嘯鳥忽飛去落花幽徑深
獨坐孤峰顛終朝無過客一嘯心自閑羣魔氣應索池清
月更明風靜葉還落白叟荷樵歸高歌亦雙腳
梅花報春信竹外香風吹青山與世隔幽意何人知冰霜
政嚴潔雲石相因依佇立望歸鶴月上寒松枝

古潭

古潭至正末慧日寺僧明初居能仁寺示寂詩爲
同時所稱

乾元宮

乾元何代宮斷碣不可考臺殿青雲端勢欲壓山倒春風
開碧桃夜雨長瑤草孰謂人世間不有蓬萊島

頂山栗

峨峨頂山高十月寒霜肅霜栗大如拳紫苞剝黃玉福荔
及夏收宜栗亦早熟獨爾飽風霜香甜頗具足

慧日寺鐘聲

慧日梁招提層樓寺中起霜天吼長鯨清響振千里州居
十萬人一聲齊到耳寒山豈相同獨落客船裏

禪房花木

破山古蘭若曲徑通後院上人理花木荷鋤日不俟花發
木向榮庶以慰所願時復花木中行吟少人見

簡招真周菊潭提點

菊潭冷浸一泓秋爲世照空名利愁采藥木鐺長在手煎

茶紗帽淺籠頭丹光出洞紅於火山色入簾青滿樓鶴背
夜聞環珮響御風又作海天遊

於慧日寺退居構南軒成鼎用長老以詩見和次韻
林下安眠藉聖明數椽頗稱隱居情隔牆十丈紅塵馬近
枕一聲清晝鶯照影石池紗帽淨扶吟野徑竹筇輕主翁
夜若能攜酒好共南軒對月傾

未晚推窗待月明更無塵事可關情鑿池雖小下雙鷺種
柳不多啼一鶯花片隔簾紅雨亂茶煙書屋白雲輕故人
知我或相過衷曲細論肝膽傾

中峰

中峰高出雲雨上住持好似生公流聽法頑石亦點首論

到長江無盡頭梵僧駝經來白馬天女散花下赤虬機鈍
若逢蘇內翰解將玉帶鎮林邱

簡寶巖渙水壑長老

清風飄飄不可攀冰纔出壑寶巖山梅邊立到月一丈松
下臥分雲半間對客酒盈銀鑿落照人詩好錦爛斑出門
有景秋開盡白鳥一雙紅蓼灣

慧日退席後意在歸隱能仁先以一詩寄甘林諸公
鬢半滄浪頂半枯海虞一箇老浮屠秋雲市井人情薄夜
雨江湖客夢孤驢足只思行故道鳳棲豈待種高梧甘林
昔日諸公子還入廬山結社圖

江西詩徵卷八十八